

張口養官赤母馬以蕃息也。又按漢書昭帝本紀：『始元五年夏，罷天下亭母馬及馬弩關。』師古引應劭注曰：『武帝數伐匈奴，再擊大宛，馬死略盡，乃令天下諸亭養母馬，欲令其繁孳。』今始罷除。此簡與有黃龍元延等年號之木簡同出土，則此簡或亦在宣元成之際；罷養馬令雖已頒布，而西域亭徼仍未廢除也。又按漢書景帝本紀：『中四年春三月，御史大夫綰奏：禁馬高五尺九寸以上，齒未平，不得出關。』師古引服虔注曰：『馬十歲，齒下平。』此云：「齒八歲，高五尺八寸。」則齒尙未平也。綜觀此簡，蓋記邊吏養馬之文，由此而當時西域之馬政可以明也。

附：西域都護考

按漢書段會宗傳贊云：『自元狩之際張騫始通西域，至於地節，鄭吉建都護之號，訖王莽之世，凡十有八人，皆以勇畧選。』按西域設都護始於鄭吉，自鄭吉以下爲都護者十八人，現可考者僅十人而已。即一、鄭吉；二、韓宣；三、甘延壽；四、段會宗；五、廉褒；六、韓立；七、段會宗（復任）；八、郭舜；九、孫建；十、但欽；十一、李崇。內段會宗復任一次。今據段會宗傳如淳注「邊吏三歲一更」之語，推論其任職年代如下：

一、鄭吉 起於宣帝神爵二年，訖於宣帝之末。（公元前六〇—四九）

按漢書宣帝紀：『神爵二年秋，匈奴日逐王先賢擣將人衆萬餘來降，使都護西域騎都尉鄭吉迎日逐，破車師，皆封列侯。』是鄭吉爲都護始於神爵二年。但漢書百官公卿表稱：『西域都護，加官，地節二年初置。』又鄭吉傳贊亦稱：『地節鄭吉建都護之號。』按鄭吉爲都護，迎日逐，在破車師之後，當爲神爵二年，鄭吉傳、西域傳均言之甚明，百官公卿表及鄭吉傳贊誤也。西域傳作神爵三年，三疑爲二字之訛；通鑑考異已辨之矣。又據三年更盡之例，則鄭吉應終更於神爵四年。但據漢書西域傳，都護鄭吉使馮夫人說烏就屠降漢事，徐松補注稱爲甘露元年事，是鄭吉在西域已八年矣。故鄭吉之終更當在宣帝之末也。

二、韓宣 起於元帝初元元年，訖於初元三年。（公元前四八—四六）